



REPUBLIKA E SHQIPËRISË  
KOMISIONI QENDROR I ZGJEDHJEVE

Komisioni i Ankimimeve dhe Sanksioneve

Data: 11.05.2023

Nr: 100

Ora: 16:35

**VENDIM**

**PËR MOSPRANIMIN PËR SHQYRTIM TË KËRKESËS ANKIMORE NR. 58, DATË 11.05.2023 TË DEPOZITUAR NGA KRYETARI I BASHKISË KUKËS Z. SAFET GJICI**

Komisioni i Ankimimeve dhe Sanksioneve në mbledhjen e datës 11.05.2023, me pjesëmarrjen e:

<b>Ilirjan</b>	<b>RUSMALI</b>	-	<b>Relator</b>
<b>Elvis</b>	<b>ÇEFA</b>	-	<b>Anëtar</b>
<b>Koli</b>	<b>BELE</b>	-	<b>Anëtar</b>

Shqyrtoi çështjen me:

**ANKUES:** Kryetari i bashkisë Kukës, z. Safet Gjici

**OBJEKT:** Kundërshtim i vendimit nr. 439, datë 05.05.2023 i Komisionerit Shtetëror të Zgjedhjeve

**BAZË LIGJORE:** Nenet 21, pika 1, shkronja "b", 123/1, 124, 126, 129 dhe 130 të ligjit nr. 10019, datë 29.12.2008 "Kodi Zgjedhor i Republikës së Shqipërisë", të ndryshuar

Komisioni i Ankimimeve dhe Sanksioneve pasi shqyrtoi dokumentacionin e paraqitur, konstatoi

## Rrethanat e çështjes:

1. Pranë Komisionit Qendror të Zgjedhjeve është administruar denoncimi me nr. 335 ID me denoncues qendra “Qëndresa Qytetare”. Pala denoncuese pretendon se ka patur përdorim të burimeve publike nga ana e z. Safet Gjici, kryetari aktual i bashkisë Kukës dhe kandidat për zgjedhjet e datës 14 Maj 2023, i propozuar nga “Partia Socialiste e Shqipërisë”.
2. Procedimi administrativ i denoncimit përfundoi me vendimin e Komisionerit nr. 439, datë 05.05.2023. Bazuar në këtë vendim, Komisioneri vuri në lëvizje KAS-in, duke kërkuar marrjen e masës administrative me gjobë ndaj z. Safet Gjici, kryetar i bashkisë Kukës, si dhe ndaj z. Betim Lushi, drejtor i shkollës 9 vjeçare “Isuf Seferi”. Vendimi i KAS-it nr. 85, datë 08.05.2023 pranoi pjesërisht kërkesën e Komisionerit dhe caktoi masës administrative, gjobë për z. Safet Gjici, sipas nenit 172, pika 1 të Kodit Zgjedhor.
3. Kryetari i bashkisë Kukës, njëkohësisht dhe kandidat për kryetar bashkie, z. Safet Gjici depozitoi pranë KQZ-së kërkesën ankimore, e cila në respektim të kritereve të përcaktuara në nenin 127, të Kodit Zgjedhor, u regjistrua në regjistrin e ankimeve zgjedhore, me nr. 58 regj., datë 11.05.2023. Në këtë kërkesë ankimore, z. Safet Gjici kundërshton vendimin nr. 439, datë 05.05.2023 të Komisionerit Shtetëror të Zgjedhjeve, duke kërkuar shfuqizimin e tij si të pabazuar në prova dhe ligj.
4. KAS-i caktoi me short anëtarin z. Ilirjan Rusmali si relator dhe vendosi zhvillimin e seancës paraprake në datën 11.05.2023, ora 16:35. Në seancë ishin të pranishëm administrata e KQZ-së, përfaqësuar nga Sekretari i Përgjithshëm z. Ylli Merkaj. Pala ankimuese, e njoftuar rregullisht nuk u paraqit në seancë.
5. KAS-i mori në shqyrtim dhe administroi:
  - Kërkesën ankimore nr. 58, datë 11.05.2023;
  - Kërkesën nr. 19, datë 06.05.2023 të Komisionerit;
  - Vendimin nr. 439, datë 05.05.2023 të Komisionerit “Për shqyrtimin administrativ të denoncimit nr. 335 ID të Organizatës “Qendresa Qytetare”, ndaj kryetarit të bashkisë Kukës, Drejtorit të Përgjithshëm të Agjencisë Shtetërore të Kadastrës, Drejtorit të Shkollës 9-vjeçare “Isuf Seferi” Kukës dhe personit përgjegjës për raportimin e

veprimtarive publike, për shkelje administrative në kuadër të zgjedhjeve vendore të datës 14 Maj 2023”;

- Vendimin nr. 85, datë 08.05.2023 të KAS-it “Për shqyrtimin e kërkesave nr. 19 dhe nr. 20, datë 06.05.2023 të Komisionerit Shtetëror të Zgjedhjeve”.

### **KAS-i konstaton:**

1. Komisioneri Shtetëror i Zgjedhjeve ka marrë vendimin nr. 439, datë 05.05.2023, si hap procedural përmbyllës për hetimin administrativ ndaj kryetarit të bashkisë Kukës z. Safet Gjici. Mbi këtë bazë Komisioneri Shtetëror i Zgjedhjeve ka proceduar me kërkesën e tij nr. 19, datë 06.05.2023 për vënje sanksioni administrativ, gjobë në masën 10 000 (dhjetë mijë) lekë ndaj z. Safet Gjici dhe 2 500 (dymijë e pesëqind) lekë, si dhe ndaj z. Betim Lushi, Drejtor i shkollës 9-vjeçare “Isuf Seferi”.
2. Vendimi nr. 439, datë 05.05.2023 shpreh vetëm vullnetin e Komisionerit Shtetëror të Zgjedhjeve për të vënë në lëvizje KAS-in me kërkesën për marrjen e masës administrative me gjobë. Ky vendim nuk sjell asnjë pasojë juridike dhe nuk cënon asnjë interes të palëve të prekura, sepse kompetenca për vendosje sanksioni administrativ është kompetencë e KAS-it. Të drejtat e palëve të prekura, në rastet e procedimit me kërkesë nga Komisioneri Shtetëror i Zgjedhjeve, mbrohen vetëm duke marrë pjesë si palë në shqyrtimin administrativ që zhvillohet nga KAS-i, dhe jo me procedurë ankimore ndaj vendimit përmbyllës të Komisionerit.
3. KAS-i ka marrë në shqyrtim kërkesën nr. 19 , datë 06.05.2023 të Komisionerit Shtetëror të Zgjedhjeve dhe me vendimin nr. 85, datë 08.05.2023 ka vendosur marrjen e masës administrative, gjobë në masën 100 000 (njëqind mijë) lekë, për z. Safet Gjici sipas nenit 172, pika 1 të Kodit Zgjedhor. Në seancën e shqyrtimit administrativ, ankuesi z. Safet Gjici nuk ka marrë pjesë edhe pse ka qenë i njoftuar për zhvillimin e saj.

4. Pas daljes të vendimit të KAS-it nr. 85, datë 08.05.2023, KAS-i e ka ezauruar kompetencën e tij vendimmarrëse dhe ankuesi e ka humbur të drejtën për të vënë në lëvizje KAS-in . Nga ky moment kompetenca i kalon Kolegjit Zgjedhor Gjyqësor dhe ankuesi mund të mbrojë të drejtat dhe interesat e tij të ligjshme, duke iu drejtuar me padi Kolegjit Zgjedhor Gjyqësor pranë Gjykatës Administrative të Apelit Tiranë, në përputhje me nenin 145 të Kodit Zgjedhor.

#### **PËR KËTO ARSYE:**

Bazuar në nenin 129, pika 3, shkronja “b” të ligjit nr. 10019, datë 29.12.2008 “Kodi Zgjedhor i Republikës së Shqipërisë”, të ndryshuar, Komisioni i Ankimimeve dhe Sanksioneve

#### **V E N D O S I:**

1. Mospranimin për shqyrtim të kërkesës ankimore nr. 58, datë 11.05.2023 të depozituar nga kryetari i bashkisë z. Safet Gjici.

Ky vendim hyn në fuqi menjëherë dhe publikohet në faqen zyrtare të Komisionit Qendror të Zgjedhjeve.

Bazuar në pikën 1, të nenit 145 të Kodit Zgjedhor mund të bëhet ankim në Kolegjin Zgjedhor Gjyqësor, pranë Gjykatës Administrative të Apelit Tiranë, brenda 5 (pesë) ditëve nga shpallja e këtij vendimi, sipas përcaktimit të pikës 2 të nenit 152 të tij.

<b>Ilirjan</b>	<b>RUSMALI</b>	-	<b>Relator</b>
<b>Elvis</b>	<b>ÇEFA</b>	-	<b>Anëtar</b>
<b>Koli</b>	<b>BELE</b>	-	<b>Anëtar</b>